

## Bekalan air Seberang Perai Selatan pulih sepenuhnya



NIBONG TEBAL: Bekalan air di tiga kawasan di Seberang Perai Selatan (SPS) yang terjejas susulan gangguan bekalan air berjadual sehingga semalam, pulih sepenuhnya pagi tadi.

Ketua Pegawai Eksekutif Perbadanan Bekalan Air Pulau Pinang (PBAPP), Datuk K Pathmanathan, berkata data direkodkan Pusat Kawalan Bekalan Air Pulau Pinang menunjukkan tekanan air di kawasan itu mencapai paras kedudukan meter ditetapkan.

"Bacaan sedemikian untuk kawasan kediaman menunjukkan bekalan pulih. Kemungkinan punca pemulihan tertangguh adalah penggunaan air sangat tinggi di SPS dan Seberang Perai Tengah (SPT) berikutan gangguan bekalan air berjadual.

"Air terawat yang dipam ke SPS tidak dapat sampai ke tiga kawasan terbabit kerana air yang digunakan pengguna terletak di huluM," katanya dalam satu kenyataan, hari ini.

Setelah tangki air dan takungan di hulu di SPT dan SPS diisi semula, katanya, isi padu air yang mencukupi pada tekanan yang betul sampai kepada pengguna terjejas di Persiaran Jawi Golf Resort, Jalan Sungai Duri dan Taman Widuri.

Kira-kira 118,000 pengguna terjejas akibat gangguan air berjadual di SPT dan SPSP selama 24 jam bermula 10 malam Jumaat lalu.

Ia susulan bahagian saluran paip utama berhampiran Politeknik Seberang Perai (PSP) di Permatang Pauh telah dirosakkan kontraktor syarikat utiliti lain, kira-kira dua minggu lalu dengan kerja pembaikan dianggar menelan RM2 juta.

Dalam pada itu, Pathmanathan sekali lagi memohon maaf di atas kesulitan yang dialami pengguna yang terjejas akibat insiden itu di Seberang Perai.